

(<https://news.usm.my>)

Berita Mutakhir

30 NOV

SISA MAKANAN JADI BAJA TANAMAN POKOK DI USM



PULAU PINANG, 30 November 2017 – Sisa-sisa makanan dari dalam kampus Universiti Sains Malaysia (USM) tidak lagi menjadi bahan buangan yang mencemarkan alam sekitar dengan terhasilnya baja kompos melalui sisa tersebut untuk kegunaan tanaman di dalam kampus.

Inisiatif daripada 500 orang mahasiswa Universiti Sains Malaysia (USM) yang menjalankan projek kelestarian ini bertujuan ingin bersama USM mencapai hasrat mengatasi ancaman isu alam sekitar yang dihadapi pada masa kini.

Menurut Timbalan Pengarah Pusat Kajian Kelestarian Global (CGSS), Dr. Mohd Sayuti Hassan, projek ini adalah hasil kreativiti mahasiswa yang mengambil subjek Kelestarian Isu dan Cabaran (WSU101), dan ia bukan sahaja memperjuangkan aspek kitar semula, malah membantu universiti dalam aspek penjimatan dan pembaziran.



“Naib Canselor amat bersetuju dengan hasil projek kelestarian ini dan berharap perkara ini dikongsi bersama komuniti luar untuk tujuan pengajaran dan kesedaran alam sekitar. Ini menambah semangat dan keyakinan mahasiswa untuk terus mengeluarkan idea-idea kelestarian bagi tujuan berkenaan.”

Tambahnya, Pejabat Aset dan Operasi (PAO) USM turut memberi sokongan berkenaan penggunaan baja kompos hasil sisa makanan di USM ini seterusnya baja yang dihasilkan akan disalurkan kepada pihak PAO untuk kegunaan tanaman pokok di dalam kampus.

“Maka dengan adanya hasil secara tidak langsung ia mampu memberi penjimatan kepada universiti kerana baja yang dihasilkan oleh mahasiswa ini berkualiti setaraf dengan baja-baja yang dijual di pasaran luar.”



Jelas Mohd Sayuti lagi, dengan sokongan ini mahasiswa mampu mempraktikkan apa yang dipelajari dalam kuliah dan dengan kemahiran yang dimiliki mereka dapat membantu menangani isu kelestarian di universiti, seterusnya dipanjangkan ke kampung dan komuniti-komuniti luar yang memerlukan.

“Selain mencipta sesuatu yang baharu daripada bahan buangan, mahasiswa juga mampu menjana ekonomi dan keadaan sosial lebih terjamin.”

Pameran kitar semula yang diadakan di Masjid Al-Malik Khalid, USM bersempena Ihtifal Maulidur Rasul selama tiga hari ini antara tujuannya berkongsi dengan komuniti tentang aspek dan hasil produk kitar semula oleh enam kumpulan mahasiswa terbaik yang dipilih oleh CGSS dari 50 kumpulan.

Teks: Mohd Azrul Mohd Azhar



Share This

Pusat Media dan Perhubungan Awam / Media and Public Relations Centre

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : pro@usm.my (<mailto:pro@usm.my>).

Laman Web Rasmi / Official Website : [Universiti Sains Malaysia](http://www.usm.my) (<http://www.usm.my>).

[Client Feedback / Comments](http://web.usm.my/smbp/maklumbalas.asp) (<http://web.usm.my/smbp/maklumbalas.asp>) | USM News Portal. Hakcipta Terpelihara USM 2015